



Broj: 05/1-50-13-29-25-8/16
Sarajevo, 20.10.2016.

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH

Sastanak je održan 14.9.2016., s početkom u 11 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Zijad Srabović, zamjenik direktora Granične policije BiH, Mustafa Ovčina, načelnik Uprave za administraciju Granične policije BiH, Mato Jozić, drugi zamjenik predsjednika Nezavisnog odbora, Adisa Begić i Miroslav Škorić, članovi Nezavisnog odbora, te Ivana Lovrić, sekretar Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Mato Jozić, drugi zamjenik predsjednika Nezavisnog odbora, ukratko je obrazložio razlog posjete. Rekao je da je posjeta organizirana u skladu s dogovorom sa zadnje sjednice Nezavisnog odbora, ali i u skladu s Planom i programom rada Nezavisnog odbora za 2016. godinu, s ciljem održavanja kontinuiteta saradnje s policijskim agencijama iz svoje nadležnosti.

Rukovodstvo Granične policije BiH istaknulo je da im trenutno veliki problem i poteškoće stvara djelovanje jednog policijskog službenika koji na sve moguće načine, kako putem anonimnih prijava Državnoj agenciji za istrage i zaštitu BiH i drugim institucijama tako i putem elektronskih medija, pokušava umanjiti ugled i značaj djelovanja rukovodstva, ali i same Granične policije BiH. Nezavisni odbor dao je podršku u vezi s ovim pitanjem, naglašavajući kako to ne smije ni na koji način da se odražava na rad i funkcioniranje Granične policije BiH.

Dalje u razgovoru direktor Granične policije g. Galić naglasio je da je u toku reforma Granične policije BiH koja se radi u saradnji s Njemačkom saveznom policijom, a na čijem čelu je direktor Diter Roman. Naglasio je da se ovom reformom, između ostalog, želi sačiniti Pravilnik o unutrašnjoj sistematizaciji radnih mjesta kojim bi se tačno i precizno definirao opis poslova za svako radno mjesto. Također, reformom se želi postići i to da se smanji broj rukovodećih službenika, a poveća broj službenika na terenu.

Direktor Granične policije ponovo je naglasio problem kadrovske nepopunjenosti policijskih službenika te da u ovom trenutku nedostaje više od 500 policijskih službenika jer se konkurs za prijem novih policijskih službenika nije raspisivao od 2010. godine do sada kada je u toku konkurs za 50 kadeta u činu "policajac" i 20 u čini „mlađi inspektor“. Pokrenuta je procedura i za prijem dodatnih 50 kadeta u činu "policajac". Također, direktor je istakao da se prilikom popunjavanja upražnjenih mjesta poštuje nacionalna struktura prema popisu stanovništva iz 1991. godine.

Dodatni problem je i što je smještajni kapacitet Akademije u Mostaru za samo 143 kadeta na tri policijske agencije u BiH. Međutim, od 1.6.2017. Akademija proširuje kapacitete na 300 smještaja.

Rukovodstvo Granične policije BiH se u razgovoru s članovima Nezavisnog odbora osvrnulo i na neophodne izmjene Zakona o policijskim službenicima BiH koje bi se odnosile na horizontalnu fluktuaciju policijskih službenika iz jedne policijske agencije u drugu. Također, ukazali su i na problem činovanja policijskih službenika gdje je gosp. Škorić predložio da se razmisli o uspostavi komisije na nivou Ministarstva sigurnosti BiH pred kojom bi se na jedinstven način polagalo i po istim kriterijima vršilo činovanje svih policijskih službenika policijskih agencija na nivou BiH. Osvrnuli su se i na preporuke Ureda za reviziju institucija BiH koje su istaknute u Izvještaju o finansijskoj reviziji za 2015. godinu.

Direktor Granične policije BiH Zoran Galić informirao je članove Nezavisnog odbora da su posredstvom Evropske komisije osigurali finansijska sredstva od 4 miliona eura koja će biti utrošena u opremanje graničnih prijelaza s videonadzorom i čitačima za registarske oznake tablica, što je od velikog značaja kada je u pitanju naplata prekršajnih kazni stranim državljanima.

Članovi Nezavisnog odbora na kraju su naglasili da će Nezavisni odbor i dalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

Sastanak je završen u 12,30 sati.

**DRUGI ZAMJENIK PREDSJEDNIKA
NEZAVISNOG ODBORA**

Mato Jozić